

關中金石文字存逸考

關中金石文字存逸考卷三

揚州甘泉毛鳳枝撰

長安縣上

周

豐宮瓦

篆書四方朱雀元武青龍白虎形中一字作

長安縣志云瓦出長安西南土中周豐宮當在
今長安鄠縣界上

秦漢瓦謂之瓦當韓非子外儲篇云堂谿公謂
昭侯曰今有千金之玉卮通而無當可以盛水
乎昭侯曰不可有瓦器而不漏可以盛酒乎昭

侯曰可對曰夫瓦器之賤也不漏可以盛酒雖
有乎千金之玉卮至費而無當不可盛水則人
孰注漿哉今爲人之主而漏其羣臣之語是猶
無當之玉卮也案此言當者物之底也瓦當卽
甬瓦之底也因識其說如此又說文艸部蒂瓜
當也从艸帶聲都計切案瓦當之制多以十字爲
界中有圓土隆然高起如瓜蒂形其卽所爲瓦
當歟 周秦漢瓦當隨時出土爲人攜去或存
或逸均不可考故此類不著存逸字今發其例

於此

秦

長生無極瓦

篆書

秦漢瓦當文字云自咸陽以南濱渭而東直抵驪山北麓廢堡隄垣間往往得之故土人目爲阿房宮瓦案長安縣志云阿房宮在縣西二十里王寺殿其地有東阿房宮西阿房宮之名一統志阿房宮在咸陽縣東二十五里

與天久長瓦

篆書

近出長安似秦篆

漢

長樂未央瓦

篆書

秦漢瓦當文字云得自漢城

長安縣志云漢長安故城在今城西

北十餘里一名陽甲城秦人亦稱爲未央宮

史記高帝紀七年長樂

宮成九年未央宮成

長生未央瓦

篆書

長安縣志云得於漢城西隅未央宮之瓦也

與天無極瓦

篆書

金石萃編云出自漢城

億年無疆瓦

篆書

金石萃編云此瓦亦未央故宮土中所出案未

央宮故址今在長安縣西北 長安城中焉

千秋萬歲瓦 篆書

秦漢瓦當文字云出漢城中宋敏求長安志引
三輔黃圖未央宮有萬歲殿

仁義自成瓦 篆書

秦漢瓦當文字云出漢城中

萬物咸成瓦 篆書

秦漢瓦當文字云朝邑縣令湯曲申鐵蟾 北定

得於長安市肆

長毋相忘瓦 篆書

長安縣志云出漢城土中

永受嘉福瓦

烏燕篆書

秦漢瓦當文字云兪太學得於長安市肆

永奉無疆瓦

篆書

秦漢瓦當文字云得於漢城

便字瓦

篆書陰文

秦漢瓦當文字云朝邑縣令陽曲申鐵蟠

北定

得於長安市肆

飛廉瓦

畫作飛廉形鹿頭有角龍身長毛豹文蛇尾四旁皆繪風氣焉

秦漢瓦當文字云得於漢城史記孝武本紀公

孫卿曰僊人好樓居於是今長安則作飛廉觀
歙縣程氏敦曰飛廉殆蛟螭之屬能致風氣

宋沈括夢溪筆談云予昔年在姑熟王敦城下
得一銅鉦其底曰諸葛士全蒼鳴鉦蒼卽古落
字也此部落之落士全部將名耳鉦中間鑄一
物有角羊頭其身亦如篆文如今時術士所畫
符旁有兩字及大篆飛廉字篆文亦古怪則鉦
閒所圖蓋飛廉也飛廉神獸之名淮南轉運使
韓持正亦有一鉦所圖飛廉及篆字與此亦同

狼千萬延瓦

篆書

秦漢瓦當文字云兪太學得於長安

鹿甲天下瓦篆書甲天下三字上爲二鹿形

長安縣志引關中記上林苑有眾鹿觀當卽此觀瓦也

上林瓦篆書

秦漢瓦當文字云得於長安市肆史記秦始皇帝本紀營作朝宮渭南上林苑中又漢書揚雄傳武帝廣開上林南至宜春鼎湖御宿昆吾旁南山而至長楊五柞北繞黃山瀕渭而東袤數百里班固西都賦云上園禁苑繚以周墻四百

餘里

衛字瓦

篆書

秦漢瓦當文字云出於漢城漢書百官公卿表
衛尉秦官掌宮門衛屯兵此瓦當卽衛尉寺瓦
或以爲秦仿六國宮室瓦者誤

宗正官當

篆書

秦漢瓦當文字云朝邑縣令陽曲申鐵蟾

北定

得於漢城漢書高帝紀七年二月置宗正官以
序九族

都司空瓦

篆書

秦漢瓦當文字云趙文學得於漢城漢書百官

公卿表宗正屬官有都司空

如注曰律司空主水及罪人賈誼曰

輸之司空編之徒官

史記魏其武安列傳上使御史簿責

魏其所言灌夫頗不讐欺謾劾繫都司空

索隱曰按

百官表云宗正屬官主詔獄也

右空瓦

篆書

秦漢瓦當文字云趙文學得於長安市肆漢書

百官公卿表少府屬官有左右司空

上林農官瓦

篆書

秦漢瓦當文字云錢別駕得於長安市肆

高安萬世瓦

篆書

秦漢瓦當文字云錢別駕得於漢城長安縣志云高安侯董賢第瓦也

有萬喜瓦

篆書

秦漢瓦當文字云錢別駕得於漢城說文喜樂也喜說也漢書喜說字多有作喜者後人乃喜

喜通用

方輿紀要云直隸定州東三十里有安險城漢縣屬中山國後漢章帝更名曰

安喜後

譌爲喜

八風壽存當

篆書

秦漢瓦當文字云得於漢城長樂鐘室趾南百

步塵埃之間爲王莽八風臺瓦

鳳枝

案班固西都賦云內則別風之嘒嘒眇麗巧而聳擢李善注引三輔故事曰建章宮東有折風闕關中記曰折風一名別風是此瓦之八風卽別風矣說文八別也古字通

大萬樂當

篆書

秦漢瓦當文字云出漢舊城當卽大樂署瓦

飛鴻延年瓦

篆書平列延年二字中畫飛鴻形

秦漢瓦當文字云長安耕民得於鴻臺址下三輔黃圖長樂宮有鴻室

長樂萬歲瓦

篆書

秦漢瓦當文字云三輔黃圖長安宮有萬歲殿
此瓦錢別駕所得

大字瓦

篆書

金字瓦

篆書

秦漢瓦當文字云大字瓦兪太學得於漢城金
字瓦錢別駕得於漢城三輔黃圖云金廡大廡
在長安城內

右將瓦

篆書

秦漢瓦當文字云朝邑縣令陽曲申鐵蟾

光定

得於長安市肆漢百官公卿表郎掌守門戶出
充車騎屬中郎有五官左右三將秩皆比二千
石此其右將署瓦歟

平樂宮阿瓦

篆書

秦漢瓦當文字云漢書武帝紀元封六年夏京
師民觀角抵於上林平樂館宮卽館對文互異
散文則通焉

衛屯瓦

篆書

秦漢瓦當文字云乃衛尉寺屯兵署瓦也嚮辨
衛字不爲秦仿六國宮室瓦得此益徵其不謬

矣

揜依中庭瓦

篆書

秦漢瓦當文字云出漢城建章宮阼

方春蕃萌瓦

篆書

秦漢瓦當文字云出漢舊城

長生未央瓦

篆書中有一篆作命形不可識

見秦漢瓦當文字

樂字瓦

篆書

秦漢瓦當文字云出漢城

六畜蕃息瓦

隸書

秦漢瓦當文字云陸文學繩得於長安市肆當

是漢獸圈署瓦

秦靈嘉神瓦

篆書

家相案目錄作秦靈鍾祥且云未詳所在與此不符未知孰是

近出長安

萬年大吉瓦

篆書

寰宇訪碑錄云浙江錢塘何氏家藏

長樂長央鳳瓦

篆書

寰宇訪碑錄云安徽歙縣程氏家藏

長安甯慶瓦

篆書

永年□□

篆書

大廿五瓦 篆書

右三種均見錢竹汀先生潛研堂金石文字目

錄中

西魏

僧口演造像記

大統四年七月

未詳所在

全文未見

寰宇訪碑錄云在長安今未詳所在矣

岐法起造像記

正書

大統十六年九月

未詳所在

全文見金石萃編

寰宇訪碑錄云在長安

長安縣志云此石前

後刻造像記左右刻弟子像題名咸甯縣志亦載之今未詳所在矣

北周

韓纂玉佛像銘

正書
保定一

未詳所在

全文未見

邑子同瑋永樂等造像記

正書
保定四年六月

未詳所在

全文見金石萃編

寰宇訪碑錄云在長安今未詳所在矣同瑋代北複姓也唐永淳二年有雍州美原縣潁陽府校尉同瑋武榦造像記亦卽此姓

王養生四面造像銘

正書

保定四年

未詳所在

全文見金石萃編說文瓦部瓠似罌長頸受十

升讀若洪从瓦工聲

古雙切

又缶部缸頂也从缶

工聲

下江切

瓠缸二字今人儲水之缸也又瓦部

罌

也从瓦公聲

讀若翁

烏貢切

缶部罌缶也从

缶罌聲

烏莖切

案食訓罌罌訓缶缶瓦器所以盛

酒漿是缶罌罌三器皆可以儲水而三器較小

故瓠字訓云似罌長頸受十升卽今儲水之大

缸雖皆瓦器而微有區別今秦人凡儲水之器

皆曰罌字亦作甕當係方言之異又說文缶部

有罌篆注云汲餅也从缶離聲鳥頁切此乃汲水

之器而非儲水之器矣

張祥造像記

正書

天和三年四月

未詳所在

全文見金石萃編

右三種見寰宇訪碑錄云均在長安今未詳所在矣潛研堂金石文字目錄云王龔生造像爲

孫淵如氏

星箭

携歸江甯置孫氏祠中

王口眞造像記

正書

天和四年七月

未詳所在

全文見金石萃編

寰宇訪碑錄云此石出於長安後歸仁和趙晉

齋家藏 金石萃編作王某造像記

嚴迴達造像記

正書

天和五年十月

未詳所在

全文未見

費氏造四面像記

正書

天和六年五月

未詳所在

全文見金石萃編

此造像一名費伯達造像

孫口造四面像碑

正書

無年月亡其下截題名多孫姓

未詳所在

全文未見

永樂縣口王口造觀音像座

正書

無年月

未詳所在

全文未見

右四種見寰宇訪碑錄云均在長安今未詳所在矣

隋

王他奴造像記

正書

開皇四年九月

逸

全文未見

寰宇訪碑錄云在長安雍州金石記云在西安

府城北

雷神廟內

長安縣志云

雷神廟在城北明萬曆四十五年重

修咸寧趙民俊有記

佛高尺有二寸以白玉石鐫成佛旁

有二侍者梵相古樓座下有記云開皇四年歲

次甲辰九月庚申二十日己卯佛弟子王他奴
爲七世父母已來及現存家口大小敬造釋迦
無口像一區又刻七世及家人之名其書法若
不經意而運筆靈妙隋唐間書法之精乃爾
關中金石記長安縣志均載此造像之目今久
逸矣

洞元子造像

正書

開皇六年十月

未詳所在

全文未見

長安縣志云在城西南六十里通元宮俗名郭
村宮 案長安縣志寺觀志云天慶觀在城南

宋大中祥符間建元至正間改爲玉清宮又改爲通元宮明宏治間住持李本懷重修有記又長安縣志土地志云五樓版在縣西南五十里所轄有北郭村南郭三村縣志既能實指其處此碑可待訪之也

王忻造像記

正書
開皇七年

未詳所在

全文見金石萃編

寰宇訪碑錄云在長安今未詳所在矣

東宮右親衛元仁宗墓誌銘

正書
開皇十年

未詳所在

全文未見

續寰宇訪碑錄云在長安今未詳所在矣

惠雲法師墓誌銘

正書

開皇十四年三月

逸

全文見古誌石華續編

誌首行題云大隋太尉晉王慧日道場故惠雲法師墓其畧曰法師俗姓賈氏河南洛陽人祖懷德本州主簿父成梁司空元法僧諮議參軍衡陽令法僧在魏作鎮彭城口之隋府翻入梁國法師聖善金陵舊族故誕於建鄴焉十歲入道事天安寺僧卓法師太尉晉王親董元戎口定江表口口法師便以家僧禮異從遊口洛陪

鎮口河還隨飛蓋重入江都復奉安車再朝象
魏以開皇十四年歲次甲寅二月十二日辰時
捨壽於內侍省云云

此石本出長安今久逸矣太尉晉王卽隋煬帝
也元法僧爲北魏陽平王熙之後叛魏投梁事
詳資治通鑑 此誌書法秀逸隋刻之佳者惜
石已磨泐非諦觀之不能得其筆妙也

大將軍昌樂公府司士行叅軍張通妻陶墓誌銘正書
開皇十七年三月

全文見古誌石華續編

誌畧云夫人諱貴丹楊丹楊人也祖恪父暹夫
人以開皇十七年三月廿一日奄然長逝春秋
五十有五卽以其月廿六日葬於長安縣龍首
鄉隋書韓擒傳弟僧壽授大將軍昌樂公此誌
之大將軍昌樂公當卽其人韓擒卽韓擒虎
也此誌書法精整原石久逸今有重摹本

終南山舍利塔銘

正書
大業五年正月

逸

全文未見

寰宇訪碑錄云在長安關中金石記云在終南
山文云京兆府大興縣御肅鄉便子谷至相道
場建立佛舍利塔案御肅卽御宿川也揚雄羽

獵賦武帝廣開上林東南至宜春鼎湖御宿昆

吾

李善文選注引辛氏三秦記曰樊川一名御宿漢書揚雄傳顏師古注曰御宿川在樊川

西方輿紀要云樊川在西安府南三十里御宿川在西安府西南四十里然則樊川御宿乃二

川非一

古肅與宿通便子谷一名榎梓谷在今

長安縣南 長安縣志云此銘爲王摩侯建在

榎梓谷一云此石在長安城南五十里百塔寺

今久逸矣

左武衛大將軍吳公尉安女墓誌銘

正書

大業十一年五

月

未詳所在

全文見古誌石華續編

誌畧云女郎姓尉字富娘河南洛陽人吳公之
第三女也曾祖兜周柱國太保公祖綱周柱國
少傅大司空吳國公父安皇朝左光祿大夫左
武衛大將軍女郎以大業十一年五月十三日
終於京宅春秋一十有八仍以其月十七日窆
於京兆郡長安縣龍首鄉興臺里母氏痛盛年
之无匹悲處女之未笄雖在幽媾婚於李氏其
牢无爽同穴在斯

此石於同治時出於長安宇迹精整後爲懷甯
張木三購去攜至山左今未知移徙何處帖肆

所行則多重摹本矣按尉安本姓尉遲卽北周尉遲迴從子其父綱北史有傳安名附見傳中史言綱父名侯兜誌云名兜史言侯兜贈柱國大將軍太傅長樂郡公諡曰定誌言兜封柱國太保公史言綱贈太保諡曰武誌中未載史言安官鴻臚卿左衛大將軍誌言安官左光祿大夫左武衛大將軍史言尉遲氏世爲代人誌言爲洛陽人蓋詳畧互異也又誌言在幽媾婚歸於李氏蓋具婚也曹操嘗欲爲子倉舒媾冥婚於邴原原以爲非禮事見魏志此風自漢魏已

然矣誌云臺上吹簫惟聞采玉

采卽弄字

又誌云載

于斯育

于卽弄字

皆北朝別體書也

北魏高貞碑載弄之弄作卡亦

別體字

又誌之篆蓋題云大隋左光祿大夫吳國

公第三女之墓誌而誌之首行則題云大隋左武衛大將軍吳公李氏女墓誌文一則從母家之序一則用其冥婚之姓皆他誌所罕見者

又長安志云雲際山大定寺內有李順興先生古記云順興居居賢村其地舊有寺周武末寺廢大業中乃以此地賜駙馬都尉吳國公尉遲安爲柴莊云云按安爲駙馬都尉史與誌均未

載得此可補其缺焉

唐

宜君縣開國子張纂妻趙夫人墓版文

正書

貞觀六年五

月

逸

全文備錄

此石題云貞觀六年五月廿九日雍州長安縣清化鄉宜君縣開國子故張纂妻趙夫人云云紀載甚簡似漢晉間墓版之式書法沈勁猶有六朝遺意原石方不盈尺想爲好事者攜去今帖肆所行多重摹本 新唐書百官志正四品

上日開國縣子食邑五百戶

光明寺大德僧慧了法師銘

正書
顯慶二年二月

存

全文見金石萃編補遺

畧云法師口慧了俗姓宋氏七歲出家十三依
眾有信行禪師一見法師歎之良久日紹隆三
寶非仙子而誰顯慶元年八月五日寢疾遷神
於光明寺禪坊春秋口十有四卽以二年二月
十五日於終南山榿梓谷禪師口口骨起塔
云云

長安志云此石在百塔寺

寺觀志云百塔寺在府城南五十里

石齋帖賈胡氏云曾赴寺內椎拓唐碑此石尙存然磨泐太甚矣誌中仙字卽佛字

此石末行題云太子太傅尙書左僕射監修國史上柱國而缺其名按新唐書宰相表永徽二年八月己巳于志甯爲尙書左僕射同中書門下三品顯慶元年正月甲申志甯爲太子太傅此銘刻於顯慶二年則末行題銜與新唐書宰相表所載志甯授官日月適相符合題銜之人當爲志甯矣又考新唐書百官志張文瓘以東臺侍郎同東西臺三品

新唐書百官志龍朔元年改中書省曰西臺二

年改門下省曰東臺黃門侍郎曰東臺侍郎 同三品入銜自文瓘始

又通鑑唐高宗紀總章二年春二月辛酉以張

文瓘爲東臺侍郎以右肅機檢校太子中護譙

人李敬元爲西臺侍郎 新唐書百官志龍朔元年改尚書左右丞曰左

右肅機三年改左右春坊左右庶子曰左右中議 並同西臺三品先是

同三品不入銜自是始入銜此石末行題銜不

書同中書門下三品者蓋此時尚未入銜是以

志甯神道碑 今在三原縣 亦云永徽二年八月拜尚

書左僕射而無同中書門下三品字樣至監修

國史之銜則見新唐書志甯本傳矣

化度寺僧海禪師方墳記

正書

顯慶二年四月

逸

全文備錄

大唐化度寺故僧海禪師年六十六俗姓劉綏
州上縣人也永徽五年八月十一日卒禪眾以
顯慶二年四月八日於信行禪師所起方墳焉
寰宇訪碑錄云在長安雍州金石記云在西安
府城南百塔寺旁僅五十餘字而字畫不俗故
存之 案此石久逸有重摹本年六十六作六
十有六卒字下多一於字末行又題顯慶三年
歲次二月廿五日癸巳建與雍州金石記所載

互有異同不得原本無從是正姑兩存之以備
考云 關中金石記云僧海禪師塔在信行禪
師塔之次

功曹參軍梁夫人成氏墓誌銘

正書

麟德元年十二月逸

全文見古誌石華

誌云殯於終南山榷梓谷之阿原石久逸今有
重摹本二一大字一小字

道安禪師塔記

正書

總章三年二月

未詳所在

全文見金石萃編

記云起塔於信行禪師塔次

關中金石記云在長安百塔寺雍州金石記云
今在西安府城南百塔寺旁書法瘦硬可喜案
原石未詳所在今有重摹本

亡宮六品墓誌銘

正書

儀鳳四年六月

逸

全文備錄

大唐故亡宮六品墓誌

承芳蘭蕙秉性松筠族茂五陵望雄六郡嬪風
早著柔範夙彰粵以良家言充永巷盤龍明鏡
契元鑿於靈臺迴文綺機符巧思於神府春秋
六十以儀鳳四年六月十二日葬於城西禮也

其詞曰 馳暉過隙閱水驚川一辭明字永閱
窮泉隴寒宵月松深曙烟唯餘令範千載攸傳
誌云葬於城西此石當出長安境內今久逸矣
亡宮六品蓋唐時宮人之號新唐書百官志內
侍省奚官局掌宮官之品凡宮人之葬三品給
百人四品八十人五品六十人六品七品十人
八品九品七人此亡宮六品卽唐誌所謂六品
葬給十人者也

都督孫管真墓誌

正書

魏書 元年十月

逸

全文備錄

大口口口都督上柱國口口郡開國公孫管
眞墓誌 諱眞城陽人也顯慶四年八月廿日
終於私第春秋卅有二以調露元年十月十四
日收骨於鷄鳴堆禪師林左起塔

此石本出長安今久逸矣有重摹本鷄同鷄

辰州辰溪縣令張仁墓誌銘

正書

調露元年十月

存

全文見古誌石華續編

今在關中書院誌畧云君諱仁字義寶南陽西
鄂人也曾祖嵩隋貝州清河縣令祖生沙州錄
事參軍父寬秉性清廉不希榮祿君爰自弱齡

光茲筮仕解褐任太倉丞秩滿遷辰州辰溪縣
令以儀鳳二年八月十日春秋六十有二卒於
辰州辰溪縣官第以調露元年十月廿三日葬
於高陽原

此石字迹秀逸文亦駢雅可誦唐初佳刻也長
安縣志圖高陽原在城西焉 新唐書百官志
司農寺卿所屬有太倉署丞五人從八品下

夫人程氏塔銘

正書

文明元年十月

逸

全文見金石萃編補遺

銘之右角已缺題銜僅存夫人程氏塔銘

並字

大小八字其畧云□□□□□□□□果東郡東阿人以顯慶四年□□□□四日終於京第春秋五十有□□文明元年十月遷葬於終□□祔徵士靈塔安□遵先志也云云

寰宇訪碑錄云在長安雍州金石記云在西安府城南已失去一角字迹清婉可喜案原石久逸都門有重摹本字迹規模似磚塔銘一派惜未觀廬山真面目也

趙克弼造阿彌陀像記

正書

垂拱元年二月

未詳所在

全文見金石萃編補遺

寰宇訪碑錄云在長安今未詳所在矣

左翊衛武騎尉王行威墓誌銘

僧彥琮撰正書
垂拱二年九月

逸

全文見古誌石華續編

誌畧云君諱行威字國寶其先太原晉陽人也
自後因官播越又爲雍州明堂縣人焉祖金朝
議郎益州司兵叅軍事父師保朝散大夫君起
家以門蔭補充左衛翊衛以垂拱二年歲次景
戌七月己亥朔十四日壬子遘疾終於頌政里
第春秋五十有六卽以其年九月戊戌朔五日
壬寅歸葬於京兆西南龍首之原禮也長子武

騎尉義方次子麟臺御書手義端等云云

此石舊爲甯武楊君

元酒

所得今未知移徙何

處書法清勁可喜唐初佳刻也余嘗謂東晉以
後書法至唐而極盛唐人書法以唐初爲極盛
自貞觀至開元其誌石傳於世者無慮數千百
種而適麗精勁酷肖歐褚者十常八九也所惜
者原石旣出移徙他處日久不可蹤迹一二拓
本流傳世間幾等吉光片羽是可慨也 新唐
書百官志四品孫五品及上柱國子補翊尉誌
云行威以門蔭補充左衛翊衛卽其職也左衛

者十六衛之一翊衛正八品上左衛之屬也行
威之父散階爲朝散大夫從五品下故行威得
補是職也吏部司勳郎中掌官吏勳級凡十有
二轉一轉爲武騎尉視從七品又志云武后垂
拱元年改秘書曰麟臺而御書手九十人則屬
於集賢殿校書秘書省之下無其名焉豈史有
缺文歟 誌爲僧彥琮撰新唐書藝文志有僧
彥琮所撰大唐京寺錄傳十卷沙門不敬錄六
卷注云龍朔時人卽撰此誌之彥琮也隋時僧
亦有名彥琮者撰崇正論等書故注云並隋有

二彥琮也 此誌四圍有字迹隱隱可辨係磨

舊誌重刻者

澤王府主簿梁寺並夫人唐氏墓誌銘

朱賓撰鄭莊正書 垂拱

四年十一月

逸

全文見古誌石華

誌云葬於終南山榭梓谷口信行禪師林側金石文字記云此石出終南山榭梓谷中寰宇訪碑錄云在長安今久逸矣

黃氏虎癡云撰誌者爲義陽朱賓而題曰四品

孫孫氏星衍續古文苑選此六題爲梁朱賓撰蓋誤以朱賓爲梁寺之孫也宜正書誌

者爲榮陽鄭莊而題曰五品孫未詳其故錢氏
竹汀曰唐書選舉志三品以上蔭曾孫五品以
上蔭孫孫降子一等此朱賓鄭莊二人法當蔭
序而尙未得官故以四品孫五品孫署銜他碑
所未有也余案新唐書百官志十六衛左右衛
上將軍所屬親衛之府一曰親府勳衛之府二
一曰勳一府二曰勳二府翊衛之府二一曰翊
一府二曰翊二府凡五府每府中郎將一人正
四品下左右郎將一人正五品上親衛正七品
上勳衛從七品上翊衛正八品上總四千九百

六十三人武德貞觀世重資蔭二品三品子補親衛二品曾孫三品孫四品子職事品五品子若孫勳官三品以上有封及國公子補勳衛及率府親衛四品孫五品及上柱國子補翊衛及率府勳衛勳官二品及縣男以上散官五品以上子若孫補諸衛及率府翊衛云云此誌稱四品孫五品孫亦卽此例殆猶潘智昭誌稱吏部常選韋瓊誌稱武部常選雖未得官亦可入衛今大員子弟得稱二品蔭生三品蔭生乃其遺意也 又百官志云唐時以親衛一府勳衛翊

衛二府謂之三府衛諸衛翊衛及率府

謂太子左右衛

率府親勳衛亦曰三衛

澤王名上金高宗子見

三宗諸子傳百官志王府主簿一人從六品上

朝請大夫雷府君墓誌

正書永昌二年

未詳所在

全文未見

寰宇訪碑錄云在長安古誌石華云是誌二石
惟篆蓋一石完好題云大唐故朝請大夫雷府
君墓誌其誌石磨泐僅存數十字不能成誦可
辨者春秋六十有五以永昌元年十月十三字
夫人以總章二年十月二十三日十二字蓋雷

君卒於武后永昌元年其夫人則先卒二十年
至是始合葬也

國子律學直講伏道朗墓誌銘

正書

萬歲通天元年五月

未詳所在

全文見古誌石華續編

誌畧云君諱之朗平陵人也曾祖周任大將軍
簡州刺史祖絢隋任軍騎將軍鷹揚郎將父誥
唐任相國朝散大夫攀鱗附翼鳴珮鏘金君以
才辯有聞功能克劭拜騎都尉授宣德郎國子
監律學直講以咸亨三年五月二日春秋五十

有四終於京兆私第嗣子元暎通直郎行幽州
三水縣主簿上柱國悲深陟岵孝著循陔啓楹
書而切慕瞻手澤而增哀夫人隋太常寺太醫
令黃鶴之女以萬歲通元年五月廿八日合葬
於京兆南高陽之原禮也

此石本出長安今未詳所在矣新唐書百官志
國子監有律學博士三人從八品下助教一人
從九品下而無直講之名得此可補其缺焉仇
姓之仇吾鄉人讀若速關中人讀若袞蓋九字

太有軌音

史記殷本紀以九侯爲三
公徐黃曰九侯一作鬼侯

是以從九

之字如姦穴之穴同軌之軌沈泉之沈皆讀軌音而周南肅肅兔置施於中達越越武夫公侯好仇遠與仇韻此其明證也又九字音舉有切九有本係同部而從有之字如溱洧之洧鱣鮪之鮪皆讀羽軌切則九有二字古音亦係疊韻關中人讀仇爲袞實爲軌字一音之轉乃由雙聲而得故余嘗云俗語多存古音此揚雄所以著方言也誌中手澤之澤作淖六朝唐初人成皋之皋多作皐故澤亦可作淖也隋龍藏寺碑

今在直隸
正定縣

碑側題名城皋作城皐隋扈志碑成

皋亦作城舉六朝隋唐人書皋舉二字不分也
又誌中萬歲通天元年通字下少一天字豈上
石時無察書之人歟又誌云道朗之父誥唐任
相國朝散大夫案唐書高祖本紀隋恭帝義甯
元年進唐王位相國唐國置丞相等官誥爲相
國朝散大夫正值其時故有攀鱗附翼之說也
隋書百官志鷹揚郎將屬左右雄武府太常
寺所屬有太醫令二人新唐書百官志文散階
正七品下曰宣德郎

袁夫人墓誌

正書

聖曆三年正月

未詳所在

全文見古誌石華

誌云殯於長安縣龍首原此石亦當出長安今未詳所在矣

黃氏虎癡曰此誌缺其祖名今案北史隋臣袁充傳云充字德符本陳郡陽夏人後廩丹陽祖昂父君正均爲梁侍中充頗解占候領太史令文帝廢太子充希旨阿附文帝然之太子遂廢煬帝卽位常以附會天文取媚於上從征遼東拜朝請大夫祕書少監復拜祕書令今以誌中祕書監之銜證之夫人之祖當爲袁充惟贈官

則傳中未載耳

游擊將軍上柱國趙智侗墓誌銘

正書

長安三年二月

未詳所在

全文見古誌石華續編

誌畧云君諱智侗南陽人也京兆侯元鳳之十代孫司空公之支派因官京師今爲長安人也曾祖純隋任隆州新井縣丞祖謙隋任利州綿谷縣令父僧德唐任天官朝議郎上柱國君以聖曆二年歲次己亥四月八日歿於神都來庭縣會節坊私第春秋五十有九夫人宗氏以長

安二年七月廿九日終於延康坊私第春秋卅
有七以長安三年歲在癸卯二月癸巳朔廿八
日庚申合葬窆於長安縣神禾原禮也長子相
王府直司上護軍令詮次子上護軍萬慶等云
云

此石近時出土未詳所在新唐書百官志武后
光宅元年改吏部曰天官誌云智儼之父僧德
唐任天官是嘗官吏部而不云所官何職此他
誌所罕見者又誌云勳階十轉爲上護軍視正
三品游擊將軍爲武散階從五品下又志云王

府屬官有百司問事謁者一人而無直司之名
豈百司卽直司之誤耶又新唐書地理志武后
光宅元年改東都曰神都天授三年析洛陽永
昌置來庭縣長安二年省方輿紀要云來庭縣
治東都內從善坊焉

未詳所在

居士尙真墓誌

正書
長安三年八月

全文見古誌石華

誌云葬於終南山雲居寺按此石本出長安今
未詳所在矣

公士安令節墓誌銘

鄭休文撰石抱壁正書
神龍元年三月

未詳所在

全文見古誌石華續編

誌畧云君諱令節字令節先武威姑臧人出自
安息國王子入侍於漢因而家焉歷後魏周隋
仕於京洛故今爲幽州宜祿人也祖瞻皇左衛
潞川府左果毅父生上柱國君以長安四年十
一月廿三日疾終於醴泉里之私第春秋六十
有子如岳國臣武臣等卽以神龍元年三月五
日葬君於長安縣之龍首原禮也

此石本出長安今未詳所在余友陽湖楊豫生

昌勛得拓本一紙出以示余因錄其全文載入

古誌石華續編中撰文之鄭休文見新唐書宰

相世系表又元和姓纂云廬山記安高安息王

子入侍宰相世系表云武威李氏本安氏出自

姬姓黃帝生昌意昌意次子安居於西方自稱

安息國後漢末遣子世高入朝因居洛陽晉魏

間居於安定後徙遼左以避亂又徙武威後魏

有難陀孫婆羅周隋間居涼州武威爲薩寶生

興貴修仁至抱玉賜姓李氏令節之先與抱玉

同族也

抱玉本安興貴曾孫恥與祿山同姓賜姓李氏肅代時平史思明有功封涼國

公新唐書有傳令節之祖瞻官左衛潞川府果毅潞川

府唐時府兵屯營之名新唐書地理志未載得

此可補其缺公士秦漢時爵名漢書百官公卿表爵一級曰公

士唐時無此爵名而此誌列入題銜未詳其故

姑闕疑以俟考云

將軍柱國史公石像銘正書延和元年七月 存

全文見金石萃編補遺

長安縣志云此石在城西

太常協律郎裴公妻賀蘭氏墓誌銘正書開元四年十二月

月

未詳所在

全文見古誌石華

誌云殯於鴉鳴埕陪信行禪師之塔長安縣志云此石在百塔寺今未詳所在矣鴉卽鴉字埕卽堆字

金滿州都督賀蘭軍大使沙陀公故夫人金城縣君

阿史那氏墓誌銘

正書

開元八年三月

未詳所在

全文見古誌石華續編

誌畧云夫人姓阿史那氏繼往絕可汗步真之曾孫竭忠事主可汗驃騎大將軍斛瑟羅之孫十姓可汗右威衛大將軍懷道之長女也年十

卷三
三
有七歸於沙陀氏封金城縣君春秋二十五以
開元七年八月二十四日遘疾終於軍舍粵以
八年三月二十九日遷祔於長安縣居德鄉龍
首原先公特府君之塋禮也

此石道光時出於長安今爲好事者攜去未知
移徙何處新唐書沙陀傳沙陀西突厥別部處
月種也居金莎山之陽蒲類海之東有大磧名
沙陀故自號沙陀突厥云永徽中卽處月地置
金滿沙陀二州詳考見下皆領都督長安二年以處
月酋沙陀金山爲金滿州都督金山死子輔國

嗣先天中避吐蕃徙部北庭率其下入朝開元
二年復領金滿州都督誌中但稱沙陀公不書
其名今以史考之輔國領都督在開元二年此
誌作於開元八年所謂沙陀公當卽輔國也考
通鑑胡身之注金滿州隸北庭都護府近古輪
臺地詳考見下唐書地理志有賀蘭州回鶻傳有賀
蘭都督府獨無賀蘭軍號得此可補其闕誌中
所載阿史那步真以下汗名官職均與西突厥
傳同 新唐書百官志武散階四十有五從一
品曰驃騎大將軍

金滿縣考

紀文達公槐西襍志云特納格爾

今爲阜康縣屬甘肅迪化

直隸州爲唐金滿縣地尙有殘碑吉木薩有唐北

庭都護府故城

吉木薩一作濟木薩在阜康縣東古城領隊大臣駐紮之北阜

康縣丞駐焉

則李衛公所築也周四十里皆以土壑

壘成每壑厚一尺闊一尺六寸長二尺七八寸

舊瓦亦廣尺餘長一尺五六寸城中一寺亦圯

石佛自腰以下陷入土猶高七八尺鐵鐘一高

出人頭四圍皆有銘鏽澀模糊一字不可辨識

惟刮視字稜相其波磔似是八分書耳城中皆

黑煤掘一二尺乃見土額魯特云

額魯特蒙古部落名此

城昔以火攻陷四面礮臺卽攻城所築其爲何

代何人則不能言之蓋在準噶爾

蒙古逆酋噶爾丹自稱準

噶爾汗康熙二十六年大兵

平定朔漠噶爾丹兵敗走死

前矣城東南岡上

一小城與大城若相犄角額魯特云以此一城

阻隘攻之不克乃以礮攻也庚寅冬烏魯木齊

提督標增設後營余與永餘齋

慶奉檄籌畫駐

兵地萬山叢雜議數日未定余謂餘齋曰李衛

公相度地形定勝我輩其所建城必要隘曷因

之乎餘齋以爲然議乃定卽今古城是也本名

破城子大學士溫公爲改此名其城望之似孤懸然山中千蹊萬徑其出也必過此城乃知古人真不可及矣又西域圖志云古城在奇臺縣治西北九十里由奇臺塘至古城五十里南北二城南城中

萬壽宮

關帝廟城西有牛圈泉乾隆四十年駐

防大臣索諾穆策凌於其地得唐時殘碑石二方有金滿縣令等字知古城爲唐金滿縣地也又案唐金滿縣應卽漢車師後部金滿城地漢時由車師前部今土魯番城地北通後部金滿城之路

當在今阜康縣東境之濟木薩阜康東境與奇
臺西境接古城與濟木薩地本相屬當爲金滿
縣東境碑石原建處不必定在縣城也據此則
今奇臺之西境阜康之東境均當爲金滿故地
無疑何願船氏

秋濤

曰拜塔克地以山名其山

在哈布塔克西青吉斯河南岸

青吉斯河在哈
彌察克和碩特

遊牧地西北當新
疆科布多城西南

由拜塔克西南行三百里至

奇臺縣界唐時以沙陀部爲沙陀州此其故壤

也又案奇臺縣隸鎮西府

今改爲鎮西廳
奇臺縣隸焉

東距

府治六百九十里奇臺縣後漢爲車師金滿城

唐爲金滿州又爲金滿縣

案唐之金滿州屬摩州也隸涼州都督府

金滿縣內地郡縣隸庭州自係兩地未可合而爲一詳考見下今奇臺縣屬木

壘城以西迄於阜康縣境特納格爾以東正當

今闕展古車師前部之北境應皆金滿地也金

滿亦作金蒲未知孰是案後漢書耿秉傳作金

蒲西域傳作金滿文獻通考引後漢書西域傳

亦作金滿蓋字形相似而譌實一地也

又案阜康縣舊

地名特納格爾在迪化州治東北二百里舊爲準噶爾古特部遊牧地入版圖後建阜康堡乾隆

四十年設縣隸迪化州

後漢車師後部金蒲城

一作金滿

唐北庭都護府庭

州金滿縣並羈縻金滿州源流異同考

附滿類考

昌二海異同考

通鑑漢明帝永平十七年司馬耿恭爲戍校尉

屯後王金蒲城章懷太子賢曰金蒲城車師後

王城庭也今庭州蒲昌縣城是也杜佑曰金蒲

城卽車師後王所治務塗谷今北庭府蒲類縣

也方輿紀要云金滿城故庭州治後漢車師王

所置城也案唐之庭州治所不常厥居見於傳

記者共有三處其一新唐書地理志云貞觀十

四年以西突厥地置庭州並置蒲昌縣

文獻通考高昌

考貞觀十四年侯君集平高昌以其東鎮城爲蒲昌縣高昌一名高昌壁今吐魯番東七十里
有冷噶和卓
卽高昌壁也尋廢顯慶三年復置長安二年爲

北庭都護府領縣四所領之縣首曰金滿而蒲

昌則改隸西州

西州今吐魯番城地

又方輿紀要云浮圖

城在廢庭州東南舊曰務塗谷班固曰漢車師

後王治務塗谷是也後謫務塗爲浮圖唐貞觀

十四年侯君集伐高昌西突厥遣其葉護阿史

那賀魯屯兵於浮圖城與高昌相影嚮及高昌

平西突厥懼二十年率眾內附乃置庭州於浮

圖城置蒲類縣屬西州改屬庭州寶應元年更

名後庭縣又文獻通考云侯君集平高昌西突厥懼而來降以其地置庭州並置蒲類縣又劉昫云貞觀二十年置金滿縣爲庭州治案方輿紀要云唐蒲昌縣城在今吐魯番西乾隆府廳州縣志云唐蒲類縣爲烏魯木齊之迪化州而槐西雜志則云今古城爲唐金滿縣地以地望準之吐魯番在古城之南烏魯木齊在古城之西相距尙遠是蒲昌蒲類金滿自係三處未可合而爲一而章懷太子以蒲昌縣爲金滿杜佑以蒲類縣爲金滿二說參差中疑有誤存以俟

考可也蓋唐時庭州治所已屬三遷始治蒲昌

繼治蒲類最後乃治金滿縣故新唐書地理志

於庭州下首繫金滿縣也今新疆烏魯木齊東

南境吐魯番北境古城西境在唐時均屬庭州

而庭州治所之金滿城則爲今之古城亦卽後

漢書車師後部之金蒲城矣此所謂名稱異而

實同者也

魏默深氏源海國圖志所繪漢代西域沿革圖則以今之烏魯木齊爲漢

車師後庭唐北庭都護治所與槐西襟志之說異

又後漢書西域傳云

自敦煌西出玉門陽關

乾隆府廳州縣志云漢敦煌縣城在今甘肅敦

煌縣西古陽關在縣西南一百三十里玉門關在縣西一百五十里

涉鄯善北通

伊吾

伊吾今哈密魏默深氏源所繪西域沿革圖謂今之闐屈爲古之鄯善案傳云涉鄯

善北通伊吾是鄯善當在伊吾之南而闐屈則在今哈密之西地望不合恐不足據惟方輿紀要云鄯善國城在哈密衛東南本名樓蘭國漢書西域傳所謂樓蘭國最在東垂近當漢白龍堆其後改名鄯善此說似爲得之乾隆府廳州縣志亦云鄯善故國在今敦煌縣西敦煌縣西境卽哈密東南境二說均與千餘里西域聞見後漢書西域傳道里相合焉千餘里錄云由嘉

路關至哈密一千四百七十里蓋今道自伊吾由嘉峪關古道而敦煌故里數不同也

通車師前部高昌壁千二百里

高昌壁在今吐魯番東七十里

有哈喇和卓卽其地西域聞見錄云由哈密至闐屈九百十里由闐屈至吐魯番二百四十里共一千一百五十里與西域傳道里所差無幾焉

自高昌壁通車師後

部金滿城五百里此西域之門戶故戊己校尉

更互屯焉

金滿城卽今濟木薩南之古城據李申耆氏北洛所繪開方輿圖吐魯番

北至古城四百里而贏通典亦云高昌北至北庭都護府四百里較後漢書西域傳差九十里而與今之里數頗相符合蓋古今里數雖有不同惟地望相符則不差矣

以古今

程途方向遠近計之適相符合則今之古城卽

後漢車師後部之金蒲城唐庭州之金滿縣城

更無疑義矣

太弁氏和瑛三州志畧謂車師後王金蒲城卽今巴里坤其說未當

葉子佩氏圭綬坤輿全圖考曰唐之蒲類縣乃車師之後庭與巴里坤之蒲類海自係兩地可以證三州志畧之誤蓋三州志畧既本杜佑之說謂唐之蒲類縣卽漢金滿城又因巴里坤爲漢之蒲類海遂謂唐之蒲類縣在今巴里坤境展轉相譌其誤由此其實唐之蒲類縣其後更名後庭者在今烏魯木齊迤

又何氏

秋濤

謂唐

化州與巴里坤相距尙遠也

之金滿州又爲金滿縣合州縣爲一此考之未
詳也新唐書地理志金滿縣隸庭州又有金滿
州都督府爲突厥二十七府之一永徽五年以
處月部置隸輪臺

輪臺詳見下

龍朔二年爲府後改

隸涼州道都督府此誌沙陀公所領金滿州都
督卽此金滿州是也是金滿州與金滿縣本係
兩地金滿縣蓋中國郡縣之地由中朝命官而
往卽今之流官金滿州爲外藩羈縻之地其酋
長世襲都督如今之土司是也故方輿紀要旣
繫金蒲城

卽唐金滿縣城

於庭州之下謂爲庭州治所

又云廢金滿州在輪臺城西唐永徽三年梁建

方等大破處月朱邪孤注

案此朱邪卽後唐沙陀之遠祖

於牟

山擒之置金滿州屬北庭都護府尋廢

案唐志有金滿

州蓋廢而復置也

胡氏曰其地與輪臺相近也

方輿紀要云輪

臺漢西域小國唐置輪臺縣屬庭州故城在廢

庭州西北三十里廢庭州在火州北百四十里

火州卽今吐魯番東之哈喇和卓也又和瑛三

州志畧謂今之烏魯木齊卽輪臺魏默深氏西

域沿革圖輪臺在今新疆哈喇沙之西南諸說不同存以俟考

考之唐書地理

志證以方輿紀要是金滿州與金滿縣自係兩

地所謂名同而實異者也又漢書宣帝本紀所

云匈奴中之蒲類海後漢書西域傳所云之蒲

昌海本係兩地後人往往合而爲一詳辨之

案漢書宣帝本紀本始二年秋大發兵擊匈奴

後將軍趙充國爲蒲類將軍應劭曰蒲類匈奴

中海名也在敦煌北案今巴里坤城直今敦煌

縣北是今巴里坤城北之巴爾庫爾泊卽漢書

之蒲類海矣蒲類巴里巴爾庫爾皆一音之轉也漢永和二年裴岑紀功碑在巴

里坤碑云立海祠以表萬世所謂海祠當指蒲類海而言又漢書西域傳云

西域河有兩源一出蔥嶺魏默深氏西域沿革圖以喀什噶爾以北

大山爲蔥嶺北幹葉爾羌以南大山爲蔥嶺南幹一出于闐今和于闐

在南山下魏圖所謂蔥嶺南山卽此其河北流與蔥嶺河合

東注蒲昌海

今名羅布泊在吐魯番西南

蒲昌海一名鹽澤

者也去玉門陽關三百餘里廣袤三百里其冰亭居冬夏不增減皆以爲潛行地下南出于積

石爲中國河云案今黃河正源發源於喀什噶

尔西之喀喇泊

是爲黃河第一源

東流匯葉尔羌和闐

諸大川總名塔里木河注羅布泊

卽蒲昌海是爲黃河第二

源又潛行地下至甘肅青海西南蒙古尔津土

司境內復出地上爲鄂敦拖羅海

元史所謂大敦腦尔是也

又匯爲札陵鄂陵二海其水東出流至積石山

爲中國河

是爲黃河第三源

是今吐魯番西南之羅布

泊卽漢書西域傳之蒲昌海矣蒲類海在巴里

坤城北蒲昌海在吐魯番西南相距幾及千里

豈能合而爲一自唐時平西突厥旣於庭州置

蒲類縣又置蒲昌縣

蒲昌縣後改屬西州唐西州治前庭縣本名高昌縣

故城在今吐魯番城東於是蒲類蒲昌每易混淆後人因

謂蒲類蒲昌爲一海名西陲紀畧謂蒲類海在

吐魯番西是直以蒲昌海爲蒲類海矣是不可

以不辨又案通鑑漢明帝永平十五年耿秉議

擊匈奴云先擊白山

西河舊事曰白山冬夏有雪匈奴謂之天山過之皆

下馬拜馬去蒲類海百里之內案方輿紀要天山在哈密衛北百二十里今蒙古謂天山爲

騰格里山騰格里蒙古語謂天也漢書匈奴傳
作揆犁霍去病傳作祁連晉書載記作赫連文
獻通考四裔考作登利唐書回鶻傳作登里蒙
古語則謂之騰格里皆一音之轉皆謂天也詳
見三十姓賢力毗伽得伊吾章惇太子賢曰伊
公主墓誌銘考後屬匈奴後取其地置宜禾都尉以爲屯田今伊
州納職縣伊吾故城是也一云伊吾故城在晉
昌縣北方與紀要云唐伊州納職縣城在哈密
衛西南乾隆府廳州縣志云唐瓜州晉昌城在
今甘肅安西直隸州張掖今甘肅甘州東古城等處皆其地也
烏孫今伊犁諸國以斷其右臂伊吾亦有南匈奴

呼衍一部破此復爲折其左角然後匈奴可擊

也上善其言十六年賀固耿忠率酒泉今甘肅

敦煌今甘肅敦煌縣張掖今甘肅甘州甲卒及

盧水羌胡萬二千騎出酒泉塞至天山擊呼衍

王斬首千餘級至蒲類海

章懷太子賢曰蒲類海今名菱志海在今

庭州蒲昌縣東南蒲昌蒲類本係兩地章懷太子仍以蒲昌海爲蒲類海分晰未清宜正之

取伊吾盧地置吏士屯田伊吾盧城又後漢書

南匈奴傳桓帝元嘉元年呼衍王將三千餘騎

寇伊吾司馬毛愷遣吏兵五百人於蒲類海東

與呼衍王戰悉爲所沒呼衍王遂攻伊吾屯城

夏遣敦煌太守司馬達將敦煌酒泉張掖屬國

吏士四千餘人出塞救之至蒲類海呼衍王聞

而引去漢伊吾爲今哈密蒲類海爲今巴里坤

之巴爾庫爾泊考其出兵道路由伊吾至蒲類海相距甚近而西域聞見錄云由哈密北至巴里坤三百三十里與漢書通里適相符合則今巴里坤之巴爾庫爾泊爲漢之蒲類海無疑而實非吐魯番西南之羅布泊漢名蒲昌海者益爲明甚此名相似而實不相同者也又元和郡縣志云拘密山拘密二字卽哈密一音之轉蓋曲禮以袂拘而退陸德明音拘古在伊州納職侯反卽鉤音也拘密卽哈密矣又北六十里唐納職縣城在今哈密西南直抵蒲類海上是尤爲哈密與蒲類海相近之

一證是以知漢時蒲類蒲昌二海之不同然後知唐代蒲類蒲昌二縣之不同知蒲類蒲昌二縣之不同然後知庭州之治所遷徙不同知其遷徙不同然後知唐之庭州最後治金滿縣也金滿縣之爲庭州治所然後知金滿州之與金滿縣一爲羈縻之州一爲中國之地亦不同也

沙陀考

新唐書沙陀傳沙陀西突厥別部處月種也居金娑山之陽

山南曰陽

蒲類海之東有大積名沙陀

故號沙陀突厥云永徽中卽處月地置金滿沙

陀二州

新唐書地理志沙陀州本隸燕然都護府後改隸隴右道涼州都督府金滿州

詳考見上

鳳枝案處月二字後轉爲朱邪唐末賜姓

李氏卽五代後唐之祖

以上釋沙陀得姓之由

方輿紀要

云金山在庭州東南西州西北

庭州治金滿縣今爲古城西州

治前庭縣本名高昌縣今吐魯番番東七十里哈喇和卓卽其地

亦謂之金沙嶺

一名金嶺唐貞觀中嘗置城爲戍守處曰金嶺

城開元中改西州爲金山都督府亦以山名又

謂之金娑山西突厥別部處月種居金娑山之

陽蒲類海之東有大磧名沙陀因自號沙陀開

元中沙陀金山入貢卽李克用之先也通鑑唐

高宗永徽二年秋七月西突厥沙鉢羅河汗寇

庭州攻陷金嶺城及蒲類縣

唐蒲類縣今烏魯木齊迪化州

新唐書地理志云西州交河縣北八十里

唐交河縣

屬西州方輿紀要云卽今吐魯番城

有龍泉館又北入谷百三十

里經柳谷

方輿紀要云柳谷在吐魯番北二百里自磧而南爲往來要口

度

金娑嶺百六十里經石會漢戍至北庭都護府

城

唐北庭都護治庭州金滿縣卽今古城

案金娑山在今吐魯番

北山南曰陽沙陀居金娑山陽則在吐魯番之

南矣所謂蒲類海以東有大磧名沙陀者卽今

吐魯番之南羅布泊之東之大戈壁矣

蒙古語謂沙漠

爲戈壁戈壁卽沙是沙陀傳之蒲類海仍係指
漢二字之轉音也

今羅布泊漢名蒲昌海

非指巴里坤之巴

庫爾泊漢名蒲類海者而言也今巴里坤以東

爲外蒙古喀爾喀札薩克圖汗之部在唐時當

屬突厥回紇薛延陀諸部非西突厥之部落矣

漢書地理志敦煌郡正西關外有白龍堆沙有蒲昌海白龍堆沙卽今之大戈壁也蒲昌海卽今之羅布泊也今大戈壁及羅布泊正直敦煌之西與班志合凡赴新疆者出關後取道安西敦煌皆折而北行至巴里坤乃折而西行至古城烏魯木齊等處以避戈壁之險也

毗伽公主墓誌銘

正書

開元十一年十一月

逸

全文備錄

唐故三十姓可汗貴女賢力毗伽公主雲中郡
夫人阿那氏之墓誌 並序

駙馬都尉故特進兼左衛大將軍雲中郡開國
公踏沒施達干阿史德覓覓

漠北大國有三十姓可汗愛女建冊賢力毗伽
公主比漢公主焉自入漢封雲中郡夫人父天
上得果報天男突厥聖天骨咄祿默啜大可汗
天授奇姿靈降英德君臨右地九姓畏其神明
霸居左衽十二部欣承美化貴主斯誕天垂織
女之星雄渠作配日在牽牛之野頃屬國家喪

亂蕃落分崩委命南奔歸誠北闕家墮犯法身
入宮闈聖渥曲流齒妃嬪之倖女住天恩載被
禮秦晉於家兄家兄卽三十姓天上得毗伽煞
可汗因承歡澤特許歸親兄右賢王墨特勤私
第兼賜絹帛衣服以充糜用荆枝再合望花萼
之相輝棠棣未華遽風霜之凋墜春秋廿有五
以大唐開元十一年歲次癸亥六月十一日薨
於右賢王京師懷得坊之第以其年十月癸巳
朔十日壬寅葬於長安龍首原禮也天漢月消
無復粧樓之影星河霧散空餘錦帳之魂男懷

恩兄右賢王手足斯斷鴈行之痛于深膝下長
違烏哺之情永絕雖送終之禮已啓松塋而推
改之俗慮爲蕪沒撫貞石以作固鑿斯文以爲
憑庶海變可知出移勿惑其詞曰 倏辭畫閣
入卧荒墳人生至此天道甯論日催薤露風急
松門千秋萬古寂寞孤魂

黃氏虎癡

本驥

曰史稱突厥之先爲阿史那氏

誌稱阿那氏者省文也默啜唐書突厥部有傳
載其兄曰骨咄祿誌稱公主父曰骨咄祿默啜
似合兄弟之稱爲一人而傳稱默啜子毗伽之

妻曰骨咄祿婆圖可敦

突厥謂其妻曰可敦今蒙古謂其妻曰哈屯可

敦哈屯一音之轉

則骨咄祿又似是突厥通稱矣開元

初突厥亡國歸附中朝公主之婿覓覓以犯法

伏誅朝命改嫁伽煞故誌云家國喪亂委命南

奔家婿犯法身入宮闈家婿謂覓覓也又云禮

秦晉於家兄謂其改嫁伽煞也其稱伽煞爲家

兄者撰文者爲伽煞之弟而公主之小叔也公

主之子曰懷恩唐書叛臣傳有僕固懷恩鐵勒

部人舊唐書載其父曰乙李暉拔新唐書曰乙

李暉顏魯公撰臧懷恪碑載其父曰

乙

恩父名也皆無伽煞之稱未知此誌懷恩卽僕固懷恩否僕固懷恩肅宗時舉兵欲叛其母拔刀殺之曰吾爲國家殺此賊若是公主之子則拔刀者乃其繼母也

此石舊爲甯武楊君元滔所得今未知移徙何

處誌於題銜之後另立題銜二行云駙馬都尉

故特進左衛大將軍雲中郡開國公踏沒施達

干達干突厥達官也見通鑑六朝陳長城公紀至德二年汪阿史德覓覓考

阿史德亦突厥大姓而覓覓題名於此未知其

故又考新唐書突厥傳開元初默啜部降者有

吐谷渾大酋慕容道奴封左衛將軍兼刺史雲
中郡公官爵與阿史德覓覓同而其名則異又
誌云公主之父爲天上得果報天男突厥聖天
骨咄祿默厥大可汗考通鑑開元二年夏四月
辛巳突厥可汗默啜復遣使求昏自稱乾和永
清太駙馬天上得果報天男突厥聖天骨咄祿
可汗與誌所稱汗號合惟多乾和永清太駙馬
七字與誌異又文獻通考云骨咄祿可汗天授
中卒其弟默啜篡其位自立爲可汗通鑑通考
所云卽誌中所謂骨咄祿默啜可汗公主之父

也默噉之兒既稱骨咄祿默噉亦稱骨咄祿骨
咄祿疑爲突厥中名號凡稱可汗皆可以三字
冠之故其可敦亦稱骨咄祿焉誌又云家國喪
亂蕃落分崩委命南奔歸誠北闕案文獻通考
四裔考云默噉既老部落多逃散開元二年默

噉遣其子移涅可汗及同俄特勤妹婿大拔頡

利發石阿失畢

大拔頡利發石阿失畢通考作一人通鑑以大拔頡利發爲一

人石阿失畢爲一人而大圍逼北庭右驍衛將

拔一作火拔與通考微異

軍通鑑作郭虔瓘擊斬同俄大拔不敢歸攜其

妻來奔制授左衛大將軍燕北郡王封其妻爲

金山公主明年十姓部落左廂咄咄大噉右廂五
弩失畢五俟斤及子婿高麗莫離支高文簡跌
跌都督思泰等各率其眾相繼來降總萬餘帳
封拜賜物各有差默噉女婿阿史得胡祿俄又
歸朝授特進毗伽公主之歸唐當在此時誌所
謂委命南奔歸誠北闕卽其事矣誌又云家婿
犯法身入宮闈黃氏謂家婿指阿史德覓覓而
言未知其審誌又云聖渥曲流齒妃嬪之倖女
蓋謂公主歸唐賜以毗伽之號得僭帝女之列
也又云天恩載被禮秦晉於家兄家兄卽三十

姓天上得毗伽煞可汗也案文獻通考開元四

年默啜可汗爲拔曳固所殺傳首京師骨咄祿

之子闕特勤殺默啜子小可汗及諸弟立左賢

王默棘連是爲毗伽可汗卽此誌之毗伽煞可汗毗伽以

開元四年卽位本蕃號爲小殺案通考作毗伽可汗此誌作毗

伽煞可汗煞卽小殺之殺蓋性仁愛自以爲得

合可汗小殺之稱而爲一也國係闕特勤之功固讓之闕特勤不受遂以爲

左賢王專掌兵馬通考之闕特勤爲左賢王此誌之墨特勤爲右賢王係兩

人從兄弟也又耶律鑄雙溪醉隱集取和林詩註元

和林城苾伽可汗之故地也歲乙未聖朝太宗

皇帝

即元太宗

城此起萬安宮城西北七十里有毗

伽可汗宮城遺址東北七十里有唐明皇開元

壬申

開元二十年歲在壬申

御製御書闕特勤碑案唐史

闕特勤骨吐祿可汗之子

案骨咄祿一作骨篤祿此作骨吐祿吐篤

音相近也

苾伽可汗之弟也名闕可汗之子弟謂之

特勤開元十九年闕特勤卒詔金吾將軍張去

逸都官郎中呂向齋聖書使北弔祭並爲立碑

上自爲文別立祠廟刻石爲像其像迄今存焉

其碑文及碑額特勤皆是殷勤之勤唐新舊史

凡書特勤皆作銜勒之勒誤也

此說作墨特勤與開元唐碑同

諸突厥部之遺俗猶呼其可汗之子弟爲特勤

特謹字也則與碑文符矣碑云特勤苾伽可汗

之令弟也可汗猶朕之子也文獻通考毗伽可汗遣使請和乞與

元宗爲子許之仍請尙唐新舊二史作毗伽可

汗苾勤二字當以碑文爲正案譯語無定字以音爲準苾伽作毗

伽以音同也特勤當作特勤自當以碑爲正誌又云因承獻澤特許

歸親右賢王墨特勤私第案新唐書突厥傳云

開元時遣兵伐毗伽可汗事在開元八年以突厥默噶

子左賢王爲將俾往征之誌以墨特勤爲右賢

王唐書作左賢王實一人也史稱骨咄祿可汗

與默啜可汗本爲兄弟闕特勤及毗伽可汗爲

骨咄祿子左賢王墨特勤卽此誌右賢王墨特勤也爲默啜

子毗伽可汗與墨特勤從兄弟行也默啜旣死

闕特勤攻殺默啜諸子及諸弟畧盡乃立其兄

默棘連爲毗伽可汗疑墨特勤以是時避難歸

唐故唐元宗伐毗伽可汗使之爲將以爲復仇

之舉旣而毗伽可汗復請和於唐故歸親仍在

墨特勤私第也惟毗伽可汗請昏於唐迄未聽

許而毗伽公主嫁與毗伽可汗史中亦無明文

且毗伽可汗亦無身至唐都之事誌中所云歸

親私第似若躬至唐都克成昏禮者疑不能明
姑從闕如之例誌又云公主子懷恩黃氏疑爲
僕固懷恩並云舊唐書謂懷恩之父名乙李吸
拔新唐書作乙李吸臧懷恪碑謂懷恩之父名
設支今案新唐書回鶻傳云僕骨亦曰僕固其
酋娑匍侯利發歌濫拔延開元初爲首領僕固
所殺詣朔方降有司誅之子曰懷恩至德時以
功至朔方節度使自有傳又叛臣傳云僕固懷
恩鐵勒部人貞觀二十年鐵勒九姓大首領率
眾降分置瀚海燕然金微幽陵九都督府列爲

蕃州以僕骨歌濫拔延爲右武衛大將軍金微

都督謫爲僕固氏生乙李噉乙李噉生懷恩世

襲都督顏真卿臧懷恪碑云懷恪爲朔方都知

兵馬使嘗以百五十騎遇突厥斬噉八部

卽默噉通鑑武后聖歷九年改默噉爲斬噉十萬餘眾於狼頭山殺

其數百人引身據高環馬禦外虜矢如雨公徒

且殲遽而給之曰我爲臧懷恪敕令和汝何得

與我拒戰乎時僕固懷恩父設支適在其中獨

遮護之諸部落持疑不肯公剖羊以盟之仗義

以責之眾皆感激由此獲免遂與設支部落二

千帳來歸唐書兩傳所載及顏魯公碑文所述
與誌文均不甚合則誌中所謂懷恩是否卽僕
固懷恩不能臆定闕疑可也又誌云聖渥曲流
齒妃嬪之倖女女字下多一住字未詳其義又
新唐書突厥回鶻兩傳其可汗多以毗伽爲號
回鶻傳云葛勒可汗以可敦妹爲女妻敦煌郡
王承寀肅宗卽封虜女爲毗伽公主是毗伽二
字在突厥中爲名號亦猶骨咄祿也此誌未經
前人著錄黃氏所考未能詳備故彙錄其說如
右並考毗伽可汗國事始末附於左方焉

文獻通考四裔考突厥別部車鼻可汗亦阿史
那之族也唐高宗永徽元年左衛郎將高侃討
擒之獻於京師車鼻既敗之後於是突厥盡爲
封疆之臣分置單于瀚海二都護府永徽以後
二十餘年北鄙無事調露元年單于管內突厥
首領阿史德傳溫奉職二部反裴行儉討平之
擒奉職永隆元年突厥又迎頡利從兄頡利爲突厥著
名酋長倨強於隋末唐初之際後爲李衛公所擒獻於京師其眾盡降之子阿史
那伏念立爲可汗復爲裴行儉所擒送詣京師
斬於都市永淳二年阿史那骨咄祿反此爲骨咄祿可

汗乃默噉可汗之父骨咄祿者頡利之疏屬伏念

既破乃自立爲可汗天授中卒默噉立爲可汗

默噉者骨咄祿之弟骨咄祿死其子尙幼默噉

遂篡其位自立爲可汗

此卽公主之父誌中所謂骨咄祿默噉可汗也

開元四年默噉爲拔曳固所殺骨咄祿之子闕

特勤立其兄默棘連是爲毗伽可汗

此卽公主所嫁之毗

伽無可汗也爲骨咄祿之子默噉可汗之猶子毗伽可汗死國人立其

子爲伊然可汗伊然可汗死其弟嗣立爲苾伽

骨咄祿可汗一名登利可汗云 案苾伽毗伽

皆一音登利可汗通鑑注登利華言果報也今

案蒙古語謂天爲騰格里登利二字卽騰格里

之轉音猶言天可汗也故回鶻傳亦有登利可

汗之號

通鑑唐順宗紀同統有騰里野合俱漢錄賦伽可汗騰里卽登里也音相同

書匈奴傳單于姓孛鞮氏其國稱之曰撐犁孤

塗單于匈奴謂天爲撐犁謂子爲孤塗案撐犁

一轉而爲祁連

漢書霍去病傳元狩三年出北地擊匈奴入至祁連山捕首虜

甚多師古曰祁連山卽天山也匈奴呼天爲祁連再轉而爲赫連

晉書載記

赫連勃勃匈奴之裔

三轉而爲登利

西突厥可汗號

一作登里

同

號至蒙古語轉爲騰格里蒙古謂天山爲騰

格里山

在新疆

天池爲騰格里泊

在西藏

撐犁祁連

赫連登利登里騰格里皆一音之轉皆謂天也
通鑑注釋登利爲果報似覺未諦 錢竹汀先
生養新錄引細素襍記歐陽永叔代王狀元謝
啓陸機閱史尙靡識於撐犁陸機事不知載何
書王冕夫云此見元晏春秋云余讀匈奴傳不
識撐犁孤塗之事有胡奴執燭顧而問之奴曰
撐犁天子也匈奴號撐犁猶漢人稱天子也其
事亦見藝文類聚類要諸書然則不識撐犁者
乃皇甫謐非陸機也

附和林考

和林本鐵伽可汗建牙之所事相關涉故附錄於此以爲考古之一助焉

平定張石舟氏穆蒙古游牧記云元和林城在

今漠北喀爾喀蒙古賽音諾顏右翼中右旗之

東北額魯特旗之西北一統志云和甯路

卽和林也

其地在校愛山東鄂爾坤塔米爾兩河之間斯

言傳之又云和林城在察罕鄂模西南百餘里

案李申耆輿圖察罕鄂模上游爲濟爾瑪台河

東北流至章鄂山西匯爲泊蒙古語謂之察罕

鄂模濟爾瑪台河由泊東北出下流入鄂爾坤

河

鄂爾坤河在賽音諾顏右翼中右旗及額魯特旗之東漠北大川也唐時謂之噶昆水爲

突厥回紇建牙之所元和林城在鄂爾坤河之西富察罕鄂模西南又鄂爾坤河之東有土拉

河亦漢北大川唐

人謂之獨樂水 又李申者輿圖濟爾瑪台河

之西有察罕鄂倫河下流入塔米爾河匯入鄂

爾坤河

地當養音諾顏部右翼中右旗東北距濟爾瑪台河甚近

元太宗紀

九年夏四月作迦堅茶寒殿地理志迦堅茶寒

殿在和林北七十餘里又張參議

名德輝字耀卿元時人

紀行云察罕泊之正西有小故城亦契丹所築

也由城四望地甚平曠可百里外皆有山山之

陰多松木瀕水則青楊叢柳而已中卽和林川

也以地望及譯語考之今之察罕鄂倫河卽元

之和林川也鄂倫二字卽和林之轉其加察罕

二字蓋由茶寒殿而得名察罕二字卽茶寒之

轉

濟爾瑪台河所匯之察罕鄂模亦由茶寒殿而得名也

考其山川準其

地望而元時和林城在今鄂爾坤河之西察罕

鄂模西南可無疑矣又李申者輿圖鄂爾坤河

東岸有西庫倫蒙古語庫倫城圍之謂也其地

與元時和林相近庫倫和林亦一音之轉

右沙陀夫人毗伽公主皆蕃族也唐至開元之

際邊功極盛故可汗貴女皆入嬪中華可謂盛

極矣不旋踵而卽有祿山之禍消息盈虛之理

有國有家者不可不鑒而喜貪邊功亦非中國

之利亦讀史者所當知也

左驍衛將軍折公妻曹氏墓誌銘

正書

開元十一年十一

月

未詳所在

全文見古誌石華

誌云窆於金光坊龍首原長安縣志北鄉紅廟
厥所屬有金光坊

香積寺主淨業法師塔銘

華彥雄撰正書

開元十二年六月

存

全文見金石萃編

關中金石記云石在長安香積寺長安縣志云
香積寺在城南子午谷正北神禾原上距城三

十五里

薦福寺思恆律師誌文

常口口撰正書
開元十四年十二月

存

全文見金石萃編

誌云葬神禾原塗山寺雍州金石記云石在西
安府南門外二十里神禾原塗山寺案神禾原
屬長安縣境又誌云律師俗姓顧氏祖元隋封
菘蕪郡公金石萃編古誌石華均云地理書無
菘蕪郡名不知二字之所本今案方輿紀要云
漢北平郡徐無縣城在順天府玉田縣東

玉田縣今

屬遼
化州

後漢因之晉爲北平郡治後魏縣屬漁陽

郡後周廢入無終縣此誌之蓀蕪卽徐無矣惟漢時僅作徐無隋時乃加艸作蓀蕪耳蓀蕪於隋時常立郡故律師之祖元得封郡公惟隋書地理志未載蓀蕪郡名也

比邱尼堅行禪師塔銘

正書

開元二十一年閏六月

未詳所在

全文見金石萃編長安縣志云石在城南五十里百塔寺今未詳所在有重摹本

冠軍大將軍金城郡公李仁德基誌銘

正書

開元二十一年

年四月

逸

全文見古誌石華續編

誌畧云公曰仁德族李氏其先蓋樂浪望族也
考甲子皇贈定州別駕公卽別駕府君之元子
也當昔中宗晏駕韋氏亂常將欲毒黎元危宗
廟公義形於色憤起於衷發皇明披紫闥奔走
電激左右風趨心冠鷹鷂手及泉鏡人祇再色
帝宇廓清是用拜公雲麾將軍行右屯衛翊府
中郎將金城縣開國子食邑三百戶晝巡徽道
環黃屋而竭誠夜拜殊榮佩紫綬而光寵是用
遷公右威衛將軍復加冠軍大將軍進封開國

公增食二千戶以開元廿一年正月廿日葬於
醴泉里之私第春秋六十有一特敕贈絹二百
匹賻物一百段米粟一百石供喪事也卽以其
年四月十三日葬於高陽原有子二人長曰思
敬右驍衛中候次曰思讓右驍衛司階

此石本出長安今未詳所在史言元宗平內難
韋庶人爲飛騎所斬安樂公主方照鏡畫眉軍
士斬之今誌有手及泉鏡之語豈割刃者卽仁
德耶漢書文帝紀夜拜宋昌爲衛將軍領南北
軍誌中夜拜殊榮卽用其事 新唐書百官志

武散階四十有五從三品上曰雲麾將軍正三品上曰冠軍大將軍十六衛左右威衛將軍各二人從三品又十六衛志注云武德五年改左右屯衛曰左右威衛此誌刻於開元時仁德嘗行右屯衛翊府中郎將是開元時復立左右屯衛而百官志未在此也諸衛中郎將正四品下左右驍衛左右中候各三人正七品下左右司階各二人正六品上

美原縣尉張昕墓誌銘

正書

開元二十四年十月

未詳所在

全文見古誌石華

誌云窆於京城南杜城東二百步

杜城村今屬長安縣南鄉

姜村雍州金石記云石在西安府城南二十里

杜城關中金石記云此誌與張希古誌

張希古誌見咸

甯並在長安劉氏乾隆辛丑歲余以廿千錢購

得之攜送於靈巖山館案此誌今未詳所在同

治時余友陽湖楊豫生

昌勛

在關中得拓本一

紙係原刻今帖肆所行小字本乃重模也

溫國寺進法師塔銘

陳光拱僧智祥行書開元二十五年七月

存

全文見金石萃編

雍州金石記云在西安府城南實際寺長安縣志云在溫國寺溫國寺在城南四十里潏水岸隋名實際寺唐開元十五年大德進法師立爲道場建塔改今名案此石尙存惟字迹模糊矣

檀法師塔銘

姜立祐撰正書
開元二十五年八月

逸

全文未見

寰宇訪碑錄云在長安石墨鑄華云在崇仁寺長安縣志云崇仁寺隋名濟度寺唐名崇聖寺明改崇仁寺俗名金勝寺在城西七里案此寺兵燹後已燬於火此石久逸

金石文字記云銘文正書而後列弟子沙門名
皆八分書焉

尚書祠部員外郎裴稹墓誌銘

裴肱撰並正書

開元二十九年歲在

辛巳二月

存

全文見古誌石華

誌云窆於長安萬春鄉神禾原

寰宇訪碑錄云在長安雍州金石記關中金石
記均云在西安府城南孟浩然集有聞裴侍御
肱自襄州司戶除豫州司戶因以投寄五律詩

一首卽撰誌之裴肱矣

安化郡馬嶺口口韋元倩墓誌銘

正書

天寶二年二月存

全文見古誌石華續編

誌畧云公諱元倩字

缺

曾祖口隋州司馬祖隱

檀州刺史考慈藏衛尉大

缺

公始尉滄州樂陵

後贊潞州屯畱更宰慶州馬嶺天寶元年八月

廿三日怛化於馬嶺之官舍享年口入以二年

二月廿日口窆於長安之畢原允子體温等云

云

此石本出長安後爲邵沐生中丞

亨諫

購得攜

至京師

王靜信妻義興周夫人墓誌銘

正書
天寶六載十月

逸

全文見古誌石華

誌云以茲吉辰赴杜城東郊雍州金石記云在

西安府城南二十里杜城

案杜城屬長安

乾隆丁丑土

人取土得之字僅二百七十餘小楷極精可喜

也無撰書人名姓有云岳也匪才當係撰文

名耳長安縣志云舊在杜城後歸汾陽某氏

崇聖寺陀羅尼經幢

張少梯行書
天寶七載五月

未詳所在

題名見金石萃編

此石向在西安府城西五里崇聖寺俗名金勝

寺兵燹後寺燬於火此石未詳所在 此幢前
行題名四人皆內侍省官又有題名一行云甯
遠將軍行左驍衛平陽郡冀城府右果毅都尉
員外置同正員直內侍省內僕局上柱國張如
意金石萃編云行左驍衛不知其何官平陽郡
冀城府不知何年置府又云觀張如意結銜正
卽六典所謂拜大將仍兼內侍者也萃編諸說
考之未詳案唐時各郡府兵皆隸京師諸衛百
官志諸衛折衝果毅都尉官階均載於十六衛
之後唐時府兵皆隸十六衛杜牧之作原十六

衛蓋爲復府兵計也新唐書兵志云太宗貞觀十年更號統軍爲折衝都尉別將爲果毅都尉諸府總曰折衝府凡天下十道置府六百三十四皆有名號而關內二百六十有一皆以隸諸

衛凡府三等兵千二百人爲上千人爲中八百

人爲下

百官志注云赤縣爲赤府畿縣爲畿府

左右衛皆領六十

府諸衛領五十至四十其餘以隸東宮六率此其大較也而府兵諸府之名則散見於地理志州郡之下新唐書地理志晉州平陽郡有府十五第四曰冀城其時冀城府隸左驍衛故云行

左驍衛平陽郡冀城府右果毅都尉也百官志
諸衛折衝都尉府每府折衝都尉一人上府正
四品上中府從四品下下府正五品下左右果
毅都尉各一人上府從五品下中府正六品上
下府正六品下兵部郎中所掌武散階四十有
五正五品下曰甯遠將軍吏部司勳郎中掌官
吏勳級凡十有二轉爲上柱國視正二品張如
意勳階爲正二品散階爲正五品下而果毅都
尉或從五品下或正六品上下其職較卑故曰
行也唐時官制以大銜領小官曰行以小銜署

大官曰守宋制猶然也其云直內侍省內僕局
百官志內侍省內僕局令二人正八品下丞二人正九品下蓋以果毅都尉
直內侍省內僕局猶云當直之謂張君本係宿
衛之官非宦者也萃編考之未詳故正之又題
名有衛士長上魏文崇等四人曝書亭集以爲
皆宿衛之士萃編云六典太子內坊有駕士六
十人則非宿衛士矣今案新唐書百官志太僕
寺乘黃署令掌供車路及馴馭之法有駕士一
百四十人凡有事先期四十日率駕士調習尙
乘隨路色供馬前期二十日調習於內侍省又

內侍省內僕局亦有駕士百四十人掌習御車
輿襍畜內僕局之駕士卽太僕寺之駕士因調
習車馬在內侍省故內僕局亦列其名其人則
係宿衛之士並非宦者也又果毅都尉張如意
題名之前爲掖庭局監作楊敬順百官志云掖
庭局監作從九品下而果毅都尉爲五六品之
職張如意若係宦者以官職而論則題名應在
楊敬順之前而列名於後者蓋內侍自爲一班
宿衛士自爲一班故張如意題名之後卽爲直
宮果毅駕士長上扶車長上諸人其班列本極

明晰萃編考之未詳故疑曝書亭考證之誤其實朱氏錫鬯之說確有可憑也扶車長上之名百官志未載得此可補其缺焉

吏部常選潘智昭墓誌銘

正書

天寶七載七月

逸

全文見古誌石華

誌云殯於長安龍首鄉咸甯縣志云石藏咸甯裴氏案此石今已移徙他處未詳所在因宜堂法帖中有重摹本 新唐書選舉志凡選有文

武文選吏部主之武選兵部主之韋瓊墓誌

見卷

一西題武部常選

武部即兵部也

此誌題吏部常選蓋

當時常選可以入銜矣

施鎗功德經

正書

大寶十三載正月姜和珍等造

未詳所在

全文未見

關中金石記云在長安香積寺今未詳所在矣

關中金石文字存逸考卷三